



Jumat, 29 Januari 2021

Ogen: Johanes 14:6



Dalam kegeluhen



Nina Jesus, Aku kap dalam nandai Dibata dinggen ndatken kegeluhen. Kata 'dalam' banci si ertiken arah turi-turin enda. seumpama kita ringan i bas sada kota A janah sura-suranta berkat ku kota B si lenga si eteh alamatna. Tupung kita ndarami alamat kota e, jumpa kita ras sekalak perbapan, si sungkuni ia kerna kota B, iturikenna man banta I ja inganna, nina: Teruskenndu erdalan arah dalin sipinter enda, kira-kita 5Km, jumpa kam kari tekongen ku kemuhen, ikuti saja tekongen e. Emaka la ndauhsa je nari lit kari persimpangan, masuk kam ku kiri, kira-kira kari 2 km, lit turunen janah jumpa ka kam nangkeng-nangkeng. Lanai ndauh je nari ibas datas uruk kari i jem kota B. Meriah kal ukurta meggi keterangan bapa enda ndai. La ndauhsa jumpa ka kita ras sekalak anak perana, si sungkun ka ia kerna alamat kota B, atena mpetangkassa tole nari. Nina anak perana e, adi ku kota B atendu bi, mari ikutken aku, gelah kam ku taruhkan ku je. Aku pe mbaru mulih jah nari, I jah kin kutangku. Adi anak kota B nge ia, mbaru ka ia jah nari, banci denga kin akapndu kita papak? Adi ras ia kita erdalan ugapape enggo pasti seh. Bage me Jesus nuriken, "Aku kap dalam," Jesus Surga nari, reh IA ku doni enda, mabai dalam man banta gelah kerina kita pe seh ku tujun geluhta eme rumah Bapa. Cataten i je, ras Jesus erdalan. Adi la ras Jesus la banci seh, janah kita pe banci papak.

Adi erdalan ras Jesus, IA arah lebe, kita ipudiNa, si ikutken ku ja IA erdalan. Si erdalan arah lebe nge biasana si mabai dalam, adi kune lit bahaya entah musuh, si arah lebe nge leben ngalakensa jadi si arah pudi e aman. Adi si ikutken Jesus arah pudiNa, aman geluhta, selamat seh ku tujun, sabab labo ipediatNa kita cilaka. Janah Jesus jelas alamat si itujuNa eme ku bas kegeluhen si rasa lalap. Tupung kita erdalan ras Jesus e kita ersikap lako iproses, sabab kita ngikutken Jesus. Kebiasaan Jesuslah si jadi kebiasaannta, jadi kebiasaan si gelgel si la bali ras Jesus man tadingenken. Bagepe biak Jesus jadi ikutenta, biakta si la bali ras Jesus pe man tadingenken. Em resikona. Saja, adi ras Jesus lanai kita banci papak, enggo jelas arah ras tujunta, janah keselamatan e jadi baginta.



